

Tapa baki cu palo of T-shirt

Santa Rosa ta promove uzo di awa recicla consciente



ORANJESTAD - Santa Rosa ta preocupa pa e situacion di segura na Aruba, como cu awasero ta hopi importante pa e sector di Cria y Agricultura. Pa e motibo aki, director di Santa Rosa sra. Nathalie Maduro, ta conseha pueblo pa pone baki pa gara awasero, pero mester tene cuenta pa tapa esaki pa e no bira criadero.

Durante e siman aki Bon Dia Aruba a publica un entrevista cu sr. Roque Dirks di Gele Koorts Muskieten Bestrijding (GKMB) cu ta informa pueblo pa tira un bista den cura, pa tira un bista riba cualkier baki cu tin e posibilidad di bira un criadero. Sr. Dirks a pone un enfasis riba barinan, bakinan, sushi, y hemchi cu ta colecta awa di airco.

E awa cu ta wordo colecta

di airco ta un hopi bon awa como cu e ta limpi, segun sra. Maduro. Bon Dia Aruba a yama Santa Rosa y a papia cu e vocero Randy Maduro y a puntre con Santa Rosa por conseha e pueblo cu kier colecta awa cu ta bin di yobida, of cu kier warda awa recicla bon.

Manera pa tapa e baki

“Nos ta conseha tur hende pa tapa e awa cu ta wordo colecta ora cu awa no ta yobiendo.” Si ta un baki grandi, preferibel haci uzo di un baki cu ta bin cu tapa. Por semper corta un palo na midi di e baki pa por tap’e ora cu mester, segun sr. Maduro. “Esaki pasobra hopi biaha un baki grandi no ta wordo uza den un biaha, y e riesgo pa e bira un criadero ta grandi e ora ey.” Si ta un baki chikito, por ta cu e lo wordo uza den un solo biaha y probablemente e dia siguiente mes lo caba di uz’e, sr. Maduro a bisa. Si

esey ta e caso, no mester worry pa tap’e.

Un otro bon manera pa personanan tapa bakinan cu ta colecta awa, incluyendo e awa den hemchi bou di un airco, ta haciendo uzo di un T-shirt, sr. Maduro a duna di conoce. Un T-shirt por wordo poni riba e baki na un forma cu e ta keda wanta y ta sirbi como un filter. E awa

cu yobe y tur sushi cu lo por bula lo mester pasa door di e T-shirt prome cu e bay den e baki, consecuentemente ta colecta awa consciente y e awa ta keda limpi, segun sr. Maduro

Kico por haci cu criadero

Bon Dia Aruba a puntra sr. Maduro si acaso un persona descuida e awa y ripara cu tin criadero aden, kico por wor-

do haci cu e awa. Sr. Maduro a bisa cu por muha mata na e momento ey ainda cu ne, pa e no bay completamente perdi, pero mester tene cuenta otro biaha pa esaki no sososde. “Si bo no colecta consciente, bo mes ta keda cu e riesgo pa cria sangura cu lo por pica bo y consecuentemente e posibilidad t’ey pa bo haya Dengue”, sr. Maduro a finalisa. □